

SHMMP langkah berterusan untuk sekat kenaikan harga: KPDNHEP

2019-12-25T01:00:02+08:00



PERIKSA: Pulnama (dua kiri) melakukan pemantauan di sebuah kedai di daerah Limbang.

LIMBANG: Pelaksanaan Skim Harga Maksimum Musim Perayaan (SHMMP) Krismas 2019 bermula pada 22 Disember hingga hujung bulan ini merupakan antara langkah berterusan untuk menyekat kenaikan harga barangan keperluan menjelang perayaan Krismas ini.

Ketua Cawangan Kementerian Perdagangan Dalam Negeri dan Hal Ehwal Pengguna (KPDNHEP) Bahagian Limbang Pulnama Tarah berkata, tempoh kuat kuasa bagi SHMMP Krismas 2019 berlangsung selama 10 hari berbanding lima hari sebelum ini.

Beliau berkata, kementerian mengenal pasti sebanyak 19 jenis barangan bagi pelaksanaan SHMMP Krismas 2019 berbanding 16 jenis barangan sebelum ini.

"Kementerian boleh bertindak di bawah Akta Kawalan Harga dan Antipencatutan 2011 melalui melalui Peraturan-Peraturan Kawalan Harga dan Antipencatutan 2018 terhadap peniaga yang sengaja menaikkan

harga tanpa alasan munasabah untuk membuat keuntungan berlebihan,” katanya ketika mengadakan pemantauan di beberapa kedai di sini, kelmarin.

Pulnoma berkata, SHMMP Krismas 2019 melibatkan penambahan barangan seperti cili merah, kubis bulat import (Indonesia dan China tidak termasuk kubis Beijing) dan ubi kentang import (China).

Kategori barangan harga terkawal terdiri daripada ayam, telur ayam, sayuran, daging kambing dan daging babi.

Jelasnya, notis di bawah Seksyen 21 Akta turut dikeluarkan dan dikuatkuasakan dengan tegas ke atas pihak yang menaikkan harga secara mendadak.

“Tindakan tegas akan diambil terhadap peniaga yang gagal mematuhi peraturan-peraturan di bawah skim ini.

“Peniaga yang melakukan kesalahan akan diambil tindakan di bawah Akta Kawalan Harga dan Antipencatutan 2011,” katanya lagi.

Tegasnya, pegawai penguatkuasa KPDNHEP akan berada di lokasi-lokasi yang menjadi tumpuan orang ramai membeli-belah seperti pasar awam, pasar tani dan pasar raya untuk menjalankan pemeriksaan dan pemantauan.

“Langkah-langkah ini mencerminkan usaha berterusan bagi melindungi pengguna daripada aktiviti pengambilan keuntungan berlebihan oleh peniaga yang tidak beretika semasa musim perayaan,” katanya lagi.

